

COMUNICÂT STAMPE

INSEGNAMENT DAL FURLAN TES SCUELIS DES TRÊ PROVINCIIIS

ZANON: 39 MIL FAMEIS E SCUASIT MIL DOCENTS A SON LA RISPUESTE AES CRITICHIS DI PÔCS

Udin, ai 29 di Novembar 2012 - La fotografie che e da cont dal insedament dal furlan tes scuclis e che e met adun la massive adesion dai gjenitôrs tal iscrivi i fruts (39 mil, plui 9 par cent rispjet l'an passât), il preseament di bande di passe 300 insegnants par vê ricevût il Grant Dizionari Bilengâl Talian Furlan di bande de ARLeF e, gnove di chescj dîs, la vierzidure dai tiermins par iscrivisi tal Elenc dai insegnants cun competencis ricognossudis par l'insegnament de lenghe furlane e che al conte bielzà 800 docents, e je pardabon confuartant.

"E je une fotografie che e met a tasê cui fats ce che isolâts e no ben identificâts grups di gjenitôrs a àn declarât cun volantins che a àn tant che unic efiet chel di invidâ a no aplicâ une leç", al comente il president de Lorenzo Zanon, che in ocasion de resinte Conference regionâl sul furlan al veve indicât propit tal recupar dal ûs de lenghe in famee cui fruts e tal inseriment inteligjent dal furlan a scuele, dutun al insegnament de storie dal Friûl, lis dôs sfidis plui decisivis pal avignì de politiche linguistiche in Friûl Vignesie Julie.

"In zonte ae leç Stât 482/99 la Regjon tal 2007 e à fat buine une sô norme sul insegnament dal furlan e, po dopo tal 2011, di un regolament. Lis normis a previodin la adozion di un Plan aplicatîf di sisteme pal insegnament de lenghe furlane e la istituzion di un Elenc regionâl dai docents di furlan. Al va dât mert ae aministrazion regionâl di vê investît doi milions di euro, un tal 2012 e un tal 2013, par l'inseriment dal furlan te scuele de infanzie e te primarie, cence par chest vê scugnût tocjâ i bêçs a disposizion par insiorâ il curriculum cun altris materiis".

Simpri te Conference sul furlan, sabide stade la Regjon e à fat savê che, daspò une campagne di informazion, lis domandis di adesion dai insegnants e je cussì aumentade di vê conseât di tornâ a vierzi i tiermins di iscrizion al elenc dai docents: daspò dome cualchi zornade lis domandis a son passe 150.

"Al è di segnalâ - al zonte Zanon - che jenfri i insegnants che si son notâts al elenc e je stade pardabon preseade la dotazion par cure de ARLeF dal dizionari bilengâl che timp indaûr al jere stât bielzà consegnât a dutis lis scuelis e bibliotechis des trê provinciis par un totâl di mil copiis". (IL GDBTF al è ancjemò a disposizion, par informazions telefonâ al 0432 555847 o scrivi a arlef@regione.fvg.it).

Dal confront cun tancj insegnants al è vignût fûr che al è domandât sore il dut l'ûs veicolâr de lenghe furlane: fat, chest, che al permetarà - cence tocjâ il rispiet de autonomie scolastiche - une impuartante integrazion de lenghe cun lis diviersis disciplinis dentri dal timp scolastic.

Il Plan aplicatîf al proviôt ancje des azions di verifiche e valutazion des ativitâts - davuelzudis, al è ben ricuardâlu, in plene libertât par chel che al inten il metodi didatic e inmaneadis su la fonde des sieltis cjapadis des assembleis dai docents - che a vignaran realizadis in aplicazion de leç 29/2007".

"La serietât professionâl e la passion che tancj insegnants e dirigjents a àn mostrât in chescj agns par fâ inressi e tutelâ il patrimoni linguistic e culturâl, cumò à podaran consolidâsi, daspò un moment di inviament, dentri il curriculum e, daspò cualchi an, in ducj i ciclis scolastics", al conclût Zanon

Elisabetta Pozzetto

Regjon Autonome Friûl Vignesie Julie
[ARLeF - Agenzie Regjonâl pe Lenghe Furlane](#)
Place XX Setembar 23
33100 Udin

0039 0432 555724 fax 0432 204158
mob 0039 335 8002058